

Ekh phuro pale, othe kerela buti, o mashines deyatinela, prastal, vazdel la, tsidel la othar:

– Soske chhe, mi chhay, mangesa te mudares tut?

– Eh, papu! Muk man – phendzhas. – Mange dunya garek nanay! Ashamakos ich thay ich nanay. Man isi man but lachho rom, ama nanay athe. Gelo po mertepi te bitinyarel. Akana me na zhanava kate si, kole dizate si. Mi sasuy, mo sastro marde man, ipalde man khamni na avri. Gelom te molinav len te pribirinen man, ama na mangena man pe khereste. Akhe ka byanav garek, a nanay kathe te byanav da. Pale te byanav da, kathe ka zhav kalke chhavesa me kokkori? Cori sinom i nanay kate te zhav. Kalilo mange anglal me yakhende, mangava te merav! Mukh man te gazinel man i mashina.

– *Aman, sakwn chedo! – vakerela o phuro. – Man chhave nanay, kher da nanay man. Ake athe kathe kerava buti, dine man ekh odaya te beshav. Ka aves pash mande ka beshes. Sar ka del o devel, chuka ka nakhyovas.*

– *Emi papu, tu ka oves mange day da, dad da! Ka beshav pash tute. Kobor sinom kadvri, tut nanay te mukav, buti da ka kerav, ka thovav da, habore kana da ka kerav, ka arakhav tut.*

– Shukar, mi chhay, me davka mangava. Me sinom phuro gareka.

A choka achhioli i chhayori pash ko phuro te beshel. Byanela chhaya. O phuro loshanela:

– Ake, o Devel bichhaldzhas mange ne ekhe chhaya, a duyen! Dad da ulyom, papus da ulyom, ekhe diveseste!

Sar te ovel veche, git-gite, git-gite, i tsikni chhay baryola. Achhola ehta bershengiri. O raklo irisalilo. I day, o dad, phende leske, kay leski romni nashli i khay muli. Ov na prandisalilo veche. Pe romnyatar, averya na dehandzhas. Na vakerde leske kay uli khamni da, na zhanela kay si zhivdi, kate si, so si. Rodindzhas la ekh bresh, duy bresh, panch bresh. Nashti arakhlyas la i na rodindzhas la po-but.

Nakhle o bresha i o phuro merela. I day naboronela nafela. Ahavela garek, kay ka merel i vakerela pe chhayake:

– Shun akana, mi chhay! Shun so ka vakerav tuke i te na bistres davka. Man garek, nanay divesa. Naboreme sinyom i ka merav. Ka achhos athe korkori. Tu sinyan ake kalkeskiri, kalke manusheskiri chhay. Ma te achhos ko droma, te zhas te rodes te dades. Ake kavka lil, te na nashales les. Athe ko lil si yazdime o adrezi da. To dad nanay te mukel tut, ov ka dehal tut. Ake predi te merav, vasieti mukava tuke, te rodes te dades.